

學圃雜疏
北墅抱瓮錄
洛陽牡丹記

牡丹榮辱志
曹州牡丹譜



17163

學

圃

雜

疏

王世懋 著

史
華
書
局

1

學圖雜疏

此據寶顏堂秘笈
本排印初編各叢
書僅有此本

自敘

余性多嗜好，亦多諳解。然幸無一事足累此心者。晚來以澹爲宗，欲一切掃去。獨愛種奇花，常命兒子。吾晚境無所須，汝輩但爲我羅致。四時花於園中，令膽瓶內日供一枝足矣。元馭閣老性醇直，無他好。獨此癖與予同。近貼書云：旦夕圖歸，爲我先致蓮香白家園中以待。余亦多病思歸，暇日輒憶花品應致者，及已致而宜愛護者，錄之以示嗣孫。二子病後禁思，作此事弄筆自娛耳。毋謂我髮種種尙作兒態也。

萬曆丁亥春日，損齋道人王世懋書。

學圃雜疏

花疏

太倉 麟洲 王世懋著

南中海山於臘月前便開。吾地稍遲。紅梅最先發。元日有開者。此花故當首植。性多蟲易敗。宜時去之。園中有深淺二種。可致其淺者。次則杭之玉牒。本園之綠萼爲佳。曾於京師許千戶家見盆中一綠萼。玉牒梅之極品。不知在何處。當詢而覓之。予資園中一綠萼梅。偃蓋婆娑。下可坐數十人。今特作高樓賞之。予孫當加意培養。若野梅可置竹林水際。爲頂梅。補園中取葉不足。登几案也。

西谷花雖草本。最先綴春色。亦不可廢。余一盆。結屈老榦天然。得之嘉定唐少谷。人以爲寶。

一掌一花者曰蘭。宜與山中特多。南京杭州俱有。雖不足貴。香自可愛。宜多種盆中。今人絕重建蘭。卻只是蕙。見古人畫蘭殊不爾。虎丘戈生曾致一盆。葉稀而長。稍粗於興蘭。出數莖。正春初開花。特大於常蘭。香亦倍之。經月不凋。酷似馬遠所畫。戈云得之他方。今尚活。時花廣求此。以備春蘭之絕品。

玉蘭早於辛夷。故宋人常以迎春。今廣中尚仍此名。千榦萬莖。不葉而花。當其盛時。可稱玉樹。樹有極大者。籠蓋一庭。然樹大則花漸小。不可不知。余童時猶見人珍重。今不然矣。

吾地山茶重寶珠。有一種花大而心繁者。以蜀茶稱。然其色類殷紅。嘗聞人言滇中絕勝。余官莆中。見士

大夫家皆種蜀茶花數千朵。色鮮紅作密瓣。其大如盆。云種自林中丞蜀中得來。性特畏寒。又不喜盆栽。余得一株。長七八尺。昇歸植澹圃中。作屋幕於隆冬。春時拆去。蓋多輒摘。卻僅留二三花。更大絕。爲余兄所賞。後當過枝廣傳其種。亦花中寶也。

海棠品類甚多。曰垂絲。曰西府。曰棠梨。曰木瓜。曰貼梗。就中西府最佳。而西府之名紫綿者尤佳。以其色重而瓣多也。此花特盛於南都。余所見徐氏西園樹皆參天。花時至不見葉。西園木瓜尤異。定是土產所宜耳。垂絲以櫻桃木接。開久甚可厭。第最先花。與玉蘭同時植之。傍掩映不可廢也。貼梗草本。郡城中種之極高大。當訪求種法。以備一種。紫綿宋小說若溪漁隱叢話備載之。

杏花無奇。多種成林則佳。城中朱氏園中百株。偃仰水旁。余嘗攜榼賞之。今當於廣園荒池別置一林。桃花種最多。若金桃蜜桃灰桃之類。多植園中取果。其可供玩者莫如碧桃。人面桃二種。緋桃乏韻。卽不種亦可也。壽星桃矮而花能結大桃。亦奇可玩。桃殊不中食。

余性雅愛梨花之類。而微恨其氣不可嗅。吾地酷少此種。溶溶院落。何可無此君。終當致之。

紫荆郁李繡毬皆非奇卉。然是點綴春光者。亦是難廢。下至金雀錦帶棣棠剪春羅。雖瑣瑣彌甚。園中安可無一繡毬。亦無足取。初見閩人來賣一花。云是紅繡毬。倭國中來者。余後至建寧。見縉紳家庭中花簇紅毬。儼如剪綵。名曰山丹。乃知是閩卉也。此種亦堪置庭中。

牡丹本出中州。汀陰人能以芍藥根接之。今遂繁滋。百種幻出。余澹圃中絕盛。遂冠一州。其中如綠蝴蝶。

大紅獅頭舞青霓尺素最難得開。南都牡丹讓江陰。獨西瓜瓢爲絕品。余亦致之矣。後當於中州購得黃樓子。一生便無餘憾。人言牡丹性瘦不喜糞。又言夏時宜頻澆水。亦殊不然。余園中亦用糞乃佳。又中州土燥。故宜澆水。吾地溼安可頻澆。大都此物宜於沙土耳。南都人言分牡丹種時。須直其根。屈之則死。深其坑以竹虛插。培土後拔去之。此種法宜知。

余以牡丹天香國色。而不能無綵雲易散之恨。因復創一亭。周遭悉種芍藥。名其亭曰續芳。芍藥本出揚州。故南都極佳。一種蓮香白。初淡紅後純白。香獨如蓮花。故以名。其性尤喜糞。予課儻慨之。其大反勝於南都。卽元馭所愛也。其他如墨紫硃砂紅之類。皆妙甚。已致數種歸。開時客皆蟻集。真堪續芳矣。

玫瑰非奇卉也。然色媚而香甚旖旎。可食可佩。園林中宜多種。又有紅黃刺梅二種。絕似玫瑰而無香。色瓣勝之。黃者出京師。蔓花五色。薔薇俱可種。而黃薔薇爲最貴。易蕃亦易敗。余園中特盛。木香惟紫心小白者爲佳。園中亦有架。宋人絕重茶蘼香。今竟不知何物。疑卽是白木香耳。今所謂茶蘼白而不香。定非宋人所珍也。

花之紅者杜鵑。葉細花小。色鮮瓣密者曰石岩。皆結數重臺。自浙而至。頗難畜。餘于安仁間徧山如火。卽山躑躅也。吾地以無貴耳。渥丹草種也。有散丹。然詩人稱之最爲近古。宜畜芍藥之後。鸞粟花最繁華。其物能變。加意灌植。妍好千態。曾有作黃色綠色者。遠視佳甚。近頗不堪。聞其粟可爲腐。澀精物也。又有一種小者曰虞美人。又名滿園春。千葉者佳。

蜀葵五色千葉者佳。性亦能變。黑者如墨。藍者如靛。大都鶯粟類也。廣庭中雖落下無所不宜。護草忘憂。其花堪食。又有一種小而純黃者曰金萱。甚香而可食。尤宜植於石畔。石竹雖野花。厚培之能作重臺異能。他如夜落金錢。鳳仙花之類。俱離落開物也。

草花多種。最惡者虎斑百合。蛺蝶花。金系芋。園亭間決不可植。故不如高良姜。白蛺蝶。尤堪入畫。偶種一兩株亦得。百合中名麝香者。人謂卽夜合花。根甜可食。宜多種園中間。取佳者爲盆供。宜與山中最多人取其根餽客。香不如家園所種。曼陀羅花香狀略同。採食能令人發狂。

夾竹桃與五色佛桑。俱是嶺南北來貨。夾竹桃花不甚佳。而堪久藏。佛桑卽護護必無存者。茉莉花百中一二可活。然終不能盛花。大抵只宜供一歲之玩。佛桑間買一二株茉莉三五株。花事過卽爲朽株矣。木樨賤物也。然有大紅千葉者。有白千葉者。一種可亞佛桑。宜覓種之。

建蘭盛於五月。其物畏風畏寒。畏鼠畏蜎蟻。其根甜爲蟻所逐。養者常以水壺隔不令得緣入。余作一屋於竹林南。外施兩重草席。坎地令稍深。貯蘭於其上。無風有好日。開門暴之。所畜二三十盆。無不盛花者。其種亦多。玉魴爲第一。白幹而花上出者是也。次金名曰蘭。其實皆蕙也。閩產爲佳。贛州蘭葉不長勁。價當減半。

石榴本在外國來者。然獨京師爲勝。中貴盆中有植幹數十年。高不盈二尺。而垂實纍纍至巨者。皮子之紅白一隨其花花而不實者曰餅子。深紅淡紅二種皆山亭之珍也。吾地不宜盆中。移歸不二年壞矣。本

地餅子紅榴稍佳而樹大非几案前物。草葉有黃白淺深紅四種存以標異可也。

素馨出閩黃者不甚香亦間攜至吾地白者香勝於茉莉卽彼中亦未之見閩中又有素蘭賽蘭二種閩者一名珍珠蘭卽廣人以爲蘭香者亦曾移植吾地多不能生。

紫薇有四種紅紫淡紅白紫卽是正色閩花物勝蘇杭獨紫薇作淡紅色最醜本野花種也白薇近來有之示異可耳殊無足貴臭梧桐者吾地野生花色淡人無植之者淮揚間成大樹花微者縉紳家植之中庭或云後庭花也獨閩中此花紅鮮異常能開百日亦名百日紅花作長鬚亦與吾地臭梧桐不同閩林中植之灼灼出矮牆上至生深澗中清泉白石斐臺奪目每欲攜子歸種種未得後當問閩人取種嘉人謂之丁香花。

蓮花種最多唯蘇州府學前種葉如傘蓋莖長丈許花大而紅結房曰百子蓮此最宜種大池中舊又見黃白二種黃名佳卻微淡黃耳千葉白蓮亦未爲奇有一種碧臺蓮大佳花白而瓣上恆滴一翠點房之上復抽綠葉似花非花余嘗種之摘取瓶中以爲西方品近於南都李鴻臚所復得一種曰錦邊蓮蒂綠花白作蕊時綠苞已微界一線紅矣開時千葉每葉俱以胭脂染邊真奇種也余將以配碧臺蓮於二池對稱亦可置大罇中爲無前之玩若所謂並頭品字四面觀音名愈奇愈不足觀切勿種。

山礬一名海桐樹婆娑可觀花碎白而香宋人灰其葉造黝紫色今人不知也以山谷詩遂得兄梅幸矣柑橘花皆清香而香櫟花尤酷烈甚於山礬結實大而香山亭前及廳事兩墀皆可植。

梔子佛經名旃蔔。單瓣者六出。其子可入藥入染。重瓣者花大而白。差可觀。香氣殊不雅。以佛所重存之。凌霄花蔓生。纏奇石老樹。作花可觀。然聞能墮胎。婦人不可採。大都與春時紫藤皆園林中不可少者。玉簪一名白鶴花。宜叢種。紫者名紫鶴。無香。可刈也。

剪秋羅色正紅。聲價稍重於剪春羅。然當盛夏已開矣。秋葵雞冠老少。秋海棠皆點綴秋容。草花之佳者。雞冠須矮脚者。種磚石砌中。其狀有掌片。毬子。纓絡。其色有紫黃白。無所不可。老少年別種有秋黃十樣錦。須雜植之。真如錦織成矣。就中秋海棠尤嬌好。宜於幽砌北窗下種之。傍以古拙一峯。藹蒲翠筠。草皆其益友也。

木樨吾地爲盛。天香無比。然須種早黃。毬子二種。不惟早黃。七月中開。毬子花密爲勝。即香亦馥郁異常。丹桂香減矣。以色稍存之餘。皆勿植。又有一種四季開花而結實者。此真桂也。閩中最多。常以春中盛開。吾地亦間有之。宜植以備一種。

芙蓉特宜水際。種類不同。先後開。故當雜植之。大紅最貴。最先開。次紅淺紅常種也。白最後開。有曰三醉者。一日間凡三換色。亦奇。客言曾見有黃者。果爾當購之。芙蓉入江西俱成大樹。人從樓上觀。吾地如榛荆狀。故須三年一斫卻。

菊至江陰上海吾州而變態極矣。有長丈許者。有大如盤者。有作異色二色者。而皆名粗種。其最貴乃各色剪絨。各色攪。各色西施。各色狼牙。乃謂之細種。種之最難。須得地得人。燥溼以時。蟲蠹日去。花須少而

大葉須密而鮮。不爾。便非上乘。元馭閣老尤愛種菊。京師有一種大紅曰麻葉紅。曰相袍紅。元馭爲翰林時。特命囊之馬首歸。今吾地尙有此種。然開不能大佳。想亦地氣使然。菊中有黃白報君知最先開。甘菊可作湯。寒菊可入冬。皆賤種也。而皆不可廢。又有一種五九月開。亦異種也。

秋花多可入。獨秋牡丹爲下品。宜勿種。

黃山茶。白山茶。紅白茶。梅皆九月開。二山茶花大而多韻。亦茶中之貴品。楊妃山茶稍後。與白菱同時開。楊妃是淡紅。殊不能佳。爲是冬初花。當具一種耳。白菱花純白而雅。且開久而繁。人云來自閩中。余在閩問之。乃無此種。始在豫章得之。定是嶺南花也。花至季冬始盡。性亦畏寒。花後宜藏室中。

蠟梅是寒花絕品。人言臘時開。故以蠟名。非也。爲色正似黃蠟耳。出自河南者曰磬口。香。色。形皆第一。松江名荷花者次之。本地狗纓下矣。得磬口荷花可廢。何況狗纓。

凡花重臺者爲貴。水仙以單瓣者爲貴。出嘉定。短葉高花。最佳種也。宜置瓶中。其物得水則不枯。故曰水仙。稱其名矣。前接臘梅。後迎江梅。真歲寒友也。

花之四季開者。蘭桂而外。有月桂。長春菊。即金桂月桂。閩種爲佳。

芭蕉。惟福州美人蕉最可愛。歷冬春不凋。常吐蓮如簇。吾地種之能生。然不花無益也。又有一種名金蓮寶相。不知所從來。葉尖小如美人蕉。種之三四歲。或七八歲始一花。南部戶部五顯廟各有一株。同時作花。觀者雲集。其花作黃紅色。而瓣大於蓮。故以名。至有圖之者。然余童時見伯父山園有此種。不甚異。

也。此卻可種。以待開時賞之。若甘露則無種。蕉之老者輒生。在泉漳間則爲蕉實耳。吾地人最重虎刺。杭州者不佳。不如本山。其物最喜陰。難種。然吾所愛者天竹。紫葉朱實。扶搖綠葉上。雪中視之尤佳。余所在種之。虎刺之下。旱珊瑚盆中可種。水珊瑚最易生。亂植竹林中亦佳。蔓生者曰雪裏珊瑚。不足植也。

菖蒲以九節爲寶。以虎鬚爲美。江西種爲貴。本性極愛陰。清明後則剪之。冬則以銅覆之。不惟明目。兼助幽人之致。余嘗過武當山。青羊澗見幽勝處。輒生泉石上。真有仙氣。宜多畜之。

福州有鐵蕉。贛州有鳳尾蕉。似同類而稍異狀。然好以鐵爲糞。將枯釘其根則復生。亦異物也。云能辟火。園林中存一二株亦可。翠筠草極陰處種之。色翠甚可愛。尤宜與秋海棠作伴。

木則天目松。枯子松。千頭柏。纓絡柏。金線柳。皆佳品也。次則丹楓。石楠。梧桐。黃楊。西湖柳。烏絨樹。北人謂之馬漫花皆可植於水次。果則櫻桃。李。枇杷。橘。栗。葡萄皆可種也。以供盤飮。予所錄次者在花。故草木之類從略。竹是吾家子猷所好。園中自當日有其種類。當別有記。

果疏

百果中櫻桃最先熟。卽古所謂含桃也。吾地有尖圓大小二種。俗呼小而尖者爲櫻珠。既吾土所宜。又萬顥丹的。掩映綠葉可玩。澹園中首當多植。梅種殊多。既花之後青而如荳。可食者曰消梅。脆梅。綠萼梅。消梅最佳。以其入口卽消也。熟而可食者曰

鶴頂梅。且霜梅梅瓣。梅供一歲之咀嚼。園林中不可少。

杏花。江南雖多。實味大不如北。其樹易成。實易給。林中摘食可佳。枇杷出東洞庭大。自種者小。然卻有風味。獨核者佳。蓋他果須接乃生。獨此果直種之亦能生也。

楊梅須山土。吾地沙土非宜。種之亦能生。但小耳。樹極婆娑可愛。今當種澹圃高岡上。與山礬相覆蔭。李種亦殊多。北土盤山麝香紅妙甚。江南絕無。然亦有一種極大而紅者。味可亞之。亦有王黃山翠嘉慶子俱稱佳品。吾園中僅有粉李一種。餘當致之。

桃有金桃銀桃水蜜桃灰桃匾桃。澹圃中已備金蜜二種。皆佳品也。

梨如袁家梨金華紫花梨不可見也。今北之秋白梨。南之宣州梨。皆吾地所不能及也。聞西洞庭有一種佳者。將熟時以箸就樹包之。味不下宣州。當覓此種植之。亦一快也。

花紅一名林禽。即古來禽也。郡城中多植之。覓利味苦非佳。而特可觀。北土之蘋婆。即此種之變也。吾地素無。近亦有移植之者。載北土以來。亦能花能果。形味俱減。然猶是奇物。王相公及政僮園俱有之。二種雖貴賤難易迥別。吾園中各植三兩株足矣。來禽種雖易。然與桃性俱多蟲而易敗。種者苦於剔蟲。若桃則數年一易可耳。

核桃北果。而宜山種。吾地絕少。然亦可種。

葡萄雖稱涼州。江南種亦自佳。有紫水晶二種。宜於水邊設架。一年可生。蠟垂可玩。不但以供餽飮也。

吾地棗不能佳。第擇其紅色者種一株。以當摘鮮亦得。

安石榴無如京師。致之南方多死。卽生多化爲叢狀。不若求富陽種種之。須實大子綻。卽不甘亦足供玩。柿種多。吾地特宜。若海門柿。罐柿。無核。火珠柿。皆甘冷可食。宜植牆隙。

柑橘產於洞庭。然終不如浙溫之乳柑。閩漳之朱橘。有一種紅而大者。云傳種自閩。而香味徑庭矣。余家東海上。又不如洞庭之宜橘。乃十產蛻花甜蜜橘二種。卻不啻勝之。金橘牛乳者。易生而品下。聞者甘香。然亦家園種者佳。第橘性畏寒。值冬霜雪稍盛。輒死。植地須北蕃多竹。霜時以草裹之。又虞春枝不發。記兒時種橘不然。豈地氣有變也。

香櫟花香實大。雖酸澁齒。以爲湯則大佳。置實盤中。盈室俱香。實佳品也。園中乃無之。而以佛手柑名。近聞洞庭人亦有種而生者。吾園中尤不易植也。

栗山果也。植之平地亦生。懸殼如蜩。亦堪備一種佳實。

銀杏樹有大合抱而不實。人言樹有雌雄。聞亦有法治之則生。樹長大。秋冬葉純黃。間楓林中相錯如繡。此植園中岡上。卽不實可也。

栝子松俗名別牙松。歲久亦生實。雖小亦甘香可食。南京徐氏西園一株。是元時物。秀色參天。目第一。山東有文官果。花亦可觀。形味稍似馬金囊。禮部精膳司亦有一株。不知可移植吾地否。若無花果不獨京師。卽吾地種輒生。但惡不足爲園林重耳。

蔬蔬附水華

非最獲利且宜吾地冬盡春初非黃真佳味但吾奉道不食耳

芥多種以春不老爲第一北京爲上南京次之吾地不逮也芥之有根者想即臺青京師大而脆爲蔬中佳味攜子歸種之城北而能生尙小已竟如之然移植他所輒不如初謂是北種比入閩則其地偏生然臺青菜云是諸葛武侯所種是也

古人食菜必曰葵土右承清齋折蔬葵是也乃今菜品竟無稱葵不知何菜當之又所重曰秋末晚菘亦竟無定說卽爾雅翼亦難憑也大都今之東菜如郡城箭桿菜之類皆可稱菘箭桿雖佳然終不敵燕地黃芽菜可名菜中神品其種亦可傳但彼中經冰霜以蘆蘆覆之菜脫色改黃而後成此卻不宜耳

薺菜空中而味脆獨南京有之可以種盆中攜歸取食人地皆不生

魏文貞公好食芹世以比曾皙之羊棗然今南北南京芹皆長數尺而味絕佳何必文貞始嗜蓋芹本水際野植而獨兩京種之老圃故佳想取植之亦得爾耳

萵苣絕盛於京口鹹食脆美卽旋摘烹之亦佳

菠菜北名亦根菜之凡品然可與豆腐並烹故園中不廢若君薺菜俗名甜菜者菜斯爲下矣

蘿蔔須長而白如雪甜而消如梨者乃稱絕品南北兩京多圓而大赤色雖佳味殊不敵也

胡蘿蔔獨常熟爲佳然酷非余所須若胡荽味苦無當而在五帶之內不植吾圃中可也

葱蒜雖與韭雖俱五葷而爲人所常用。薤性稍平。江浙多有之。吾地少亦可不種。

薯蕷本山中野植。與黃獨同類。故名山藥。然獨保定懷慶諸處爲佳。閩浙多作紅色。而味不甘糯。吾地種美惡在兩種間。亦不可廢。

芋古名蹲鴟。吾土最佳。有水旱紫白二種。旱者不可食。此地若種之得法有十斤者。

香芋落花生產嘉定。落花生尤甘。皆易生物可種也。甘藷子如耳環。醬食之脆美。亦別方之產。吾地可種。莧有紅白二種。素食者便之。肉食者忌與鼈共食。一種野生及馬齒莧俱堪食。

百草中可食者最多。薺菜枸杞苗五加芽草中之美味。菊苗亦佳。大抵摘野蔬入饌尤覺趣耳。藜蒿多生江岸。九江諸處採賣。以數百石船裝之遠貨。吾地亦自不乏。

芡一名雞頭。果中之美味。而最補益人。然獨杭州多而佳。京師產者形如刺蝟而有稜。糯而大者味勝。杭產吾地俱不宜。然勤種之鮮摘亦勝。

菱卽菱也。而多種。有紅有綠。有深水有淺水。有角有腰。而產於郡城者曰哥窰菱。產於崑山者曰婁縣。皆佳甚。須其種極之。

茭白以秋生。吳中一種春生曰呂公茭。以非時爲美。初出時煮食甜軟。據爾雅翼曰。茭卽菰蔣之類。曰菰首者。卽今之茭白也。又有黑縷如黑點者名烏縷。今茭中有之。余所種僅秋生者耳。然菰實有米。而今茭白未聞有之。或者野茭乃生米也。

茨菰古曰薺。茨種淺水中。夏月開白花。秋冬取根食。味亞於香芋。

荸薺方言曰地栗。亦種淺水。吳中最盛。遠貨京師爲珍品。色紅嫩而甘者爲上。

蓮房之大者名百子蓮。藕則白蓮單瓣者乃生。高郵寶應第一。吳中亦佳。吾土僅供玩耳。蓴以張陸所誇。遂爲吳中口實。然實不佳。且非池塘間物也。

蒲筍蘆筍皆佳味。而蒲筍尤佳。吾地人乃不知取食耳。然種蒲者多聞取之。苦不成筍。豈其種別耶。

瓜蔬

西瓜古無稱。云金主征西域得之。洪皓自燕中攜歸。然瓜中第一美味。而種徧天下。不應晚出異方之物。乃爾。吾地以蔣福棚橋二處爲絕品。然家園中所種色青白而作枕樣者更佳。不必蔣棚也。

甜瓜以香而小者爲第一。作黃綠二色。豈卽邵平所種五色子母瓜耶。今涼州塞外作乾條遺遠人。味極甘。當是此種。若南瓜雖有奇狀殊色。僅堪養食。酷無意味。而更與羊食忌。是可廢。

王瓜出燕京者最佳。其地人種之火室中。逼生花葉。二月初卽結小實。中官取以上供。唐人詩云。二月中旬已進瓜。不足爲奇矣。又一種秋生者亦佳。吾土俱宜。閩中二三月間食。入夏枯矣。

瓜之不堪生噉。而堪醬食者曰菜瓜。圓者如甜瓜。長者如王瓜。皆一類也。以甜醬漬之。爲蔬中佳味。天下結實大者無若冬瓜。味雖不甚佳。而性溫可食。

絲瓜北種爲佳。以細長而嫩者爲美。性寒無毒。有云多食之能痿陽。北人時噉之殊不爾。然用其蒂可治。